

四庫全書

子部

欽定四庫全書

太平御覽卷一百三十八

宋 李昉等 撰

皇親部四

魏武宣卞皇后

文帝甄皇后

文帝郭皇后

明帝毛皇后

明帝郭皇后

晉宣穆張皇后

景懷夏侯皇后

文明王皇后

武元楊皇后

武悼楊皇后

惠帝賈皇后

惠帝羊皇后

謝夫人

附

懷帝王太后

梁皇后

元帝夏侯太妃

虞皇后

荀氏附

明帝庾皇后

成恭杜皇后

康獻褚皇后

簡文鄭皇后

孝武李太后

王皇后

安德陳太后

恭帝褚皇后

魏武宣卞皇后

魏志曰武宣卞皇后瑯琊人文帝母也本倡家年二十
太祖於譙納后為妾後隨太祖至洛及董卓為亂太祖
微服東出避難袁術傳太祖凶問時太祖左右在洛者
皆歸后止之曰曹君吉凶未可知今日還家明日若在
何面目復相見也正使禍至共死何若遂從后言太祖
聞而善之建安初丁夫人廢遂以后為繼室諸子無母

者太祖皆命后養之文帝為太子左右長御賀后曰將軍拜太子天下莫不忻喜后當傾府藏賞賜后曰王自以丕年大故用為嗣我但當以免無教導之過為幸甚耳亦何當賜遺乎長御還見以語太祖太祖悅曰怒不變容喜不改節是最為難二十四年拜為王后文帝踐祚尊后曰太后稱永壽宮

魏書曰后以漢延熹三年生齊郡白亭有黃氣滿室移日父敬侯怪之以問卜者王旦旦曰此吉祥也為太后

見外親不假以顏色常言居處當務節儉不當妄賞賜
念自勉也帝為太后弟秉起第及成太后幸第請諸家
外親設下廚無異膳太后左右菜食粟飯無魚肉其儉
如此

文帝甄皇后

魏志曰文昭甄皇后中山無極人明帝母也父逸上蔡
令后三歲失父後天下兵亂加以饑饉百姓皆賣金銀
珠玉寶物時后家大有儲穀頗以買之后年十餘歲謂

母曰世今亂多買寶物匹夫無罪懷璧為罪又左右皆
饑乏不如以穀賑給親族隣里廣為恩惠也舉家稱善
即從后言建安中袁紹為中子熙納后冀州平文帝納
后於鄴有寵生明帝郭后李陰貴人並受幸后愈失意
有怨言帝大怒遣使賜死葬於鄴明帝即位有司奏請
追謚又別立寢廟太和元年追封逸謚曰敬侯適孫像
襲爵初營宗廟掘地得玉璽方一寸九分其文曰天子
羨思慈親明帝為之改容以太牢告廟又嘗夢見后於

是舅氏親屬高下敘用各有差賞賜累巨萬

魏志曰甄后每寢寐家中髣髴見人持王衣覆其上者
常共怪之相工劉良相后曰此女貴不可言后自少至
長不好戲弄年八歲外有立騎戲馬者家人諸姊皆上
閣觀之后獨不行年九歲喜書視字輒識數用諸兄筆
硯兄謂后言汝當作女博士耶后答言聞古者賢女未
有不覽前世成敗以為己誠不知書何由見之及為皇
后寵愈隆而彌挹損每因閒宴常勸帝言昔黃帝子孫

蕃育盖由媵妾衆多乃獲斯祚耳所願廣求淑媛以豐繼嗣帝心喜焉

文帝郭皇后

魏志曰文德郭皇后安平廣宗人也祖世長吏后少而父永奇之曰此吾女中王也遂以女王為字早失二親喪亂流離沒在銅鞮侯家太祖為魏公時得入東宮后有智數時有所獻納文帝定為嗣后有謀為太子即王位后為夫人及踐祚為貴嬪甄后之死由后之寵也遂

立為后黃初五年帝東征后留許昌永始臺時霖雨百餘日城樓多壞有司奏請移止后曰昔楚昭王出遊貞姜留漸臺江水至使者迎而無符不去卒沒今帝在遠吾幸未有是患而便移止奈何明帝即位尊后為皇太后稱永安宮

明帝毛皇后

魏志曰明帝毛皇后河內人以選入東宮明帝時為平原王進御有寵出入與同輦及即位立為皇后初明

帝為王始納河內虞氏為妃帝即位虞氏不得立卞太后慰勉焉虞氏曰曹氏好立賤未有能以義舉者也后父嘉為奉車都尉嘉本典車工卒暴富貴舉動甚蚩驥侯皆切語輒自稱侯身時人以為笑帝之幸郭皇后也后

愛寵日衰景初元年帝遊後園召才人以上宴樂左右請延皇后不許帝乃禁左右使不得宣后知之明日帝見后后曰昨日遊宴北園樂乎帝以左右泄之所殺十餘人賜后死然猶加謚葬愍陵

明帝郭皇后

魏志曰明帝郭皇后西平人也世河右大族黃初中本郡反叛遂沒入宮明帝即位甚見愛幸拜為夫人帝疾困遂立為皇后齊王即位尊后曰皇太后稱永寧宮值三主幼弱宰輔親政與奪大事皆先啓太后然後施行母丘儉鍾會等假其命以為亂焉景元四年崩

晉宣穆張皇后

晉書曰宣穆皇后張氏諱春華高祖同郡人也母河內

山氏司徒濤之從祖姑也后少有德行智識初高祖辭仕以風痺不能起嘗曝書遇雨自起收書家惟一婢見之后懼言語泄漏乃手殺之而自執爨焉帝由是重之其後柏夫人有寵后罕得進見帝卧疾后往省病帝曰老物可憎何煩出也后慙恚不食將自殺諸子亦不食帝驚而致謝后乃止退而謂人曰老物不足惜慮困我好兒耳魏正始八年崩武帝受禪追尊為皇太后

景懷夏侯皇后

晉書曰景懷夏侯皇后沛國譙人也父尚魏征南大將軍母曹氏魏德陽鄉主后雅有識度帝每有所為必預籌畫魏明帝世皇帝居上將之重諸子並有雄才大略后知帝非魏之純臣而后既魏氏之甥帝深忌之青龍二年以鴆崩武帝登祚始加號謚

文明王皇后

王隱晉書曰文明皇后王肅女秉德清貞體行純和八歲誦詩論特精喪服苟有文義過目則識祖司徒朗異

之曰興吾家者必此女矣惜不為男每居大喪常身不勝衣及鍾會以才能見任后每言於文帝曰會好為事端寵過必亂太始元年尊為皇太后宮曰崇禮自即尊位眷戀素業忽棄華麗四年薨

晉書曰后諱元姬年十二祖朗薨后哀戚哭泣發於自然其父益加敬異既筭歸於文帝生武帝

武元楊皇后

晉書曰武元楊皇后弘農華陰人也有善相后當極貴

故文帝為武帝娶之生惠帝武帝疑惠帝不堪奉大統
密以語后后曰立嫡以長不以賢豈可動乎帝採諸葛
冲等五十人女入殿露面常衣令后選取后不取端正
唯取長白時卜藩女有美色帝舉扇鄣面語后曰藩女
可后曰藩三世后族不宜枉以卑位其中者以絳紗繫
臂遂取胡芳芳啼哭左右曰陛下聞聲芳曰死且不畏
何畏陛下帝壯其言父奮聞女中選亦哭曰老奴不死
唯有二兒男在九地之下女在九天之上帝拜芳為貴

嬪元后疾甚見上素敬胡夫人恐立之又慮太子不安
臨終枕帝膝曰從妹男肩有德色不足復娶異姓帝許
之崩於光明殿

武悼楊皇后

晉書后妃列傳曰后諱芷字季蘭小字男肩武帝繼室
也太傅楊駿女咸寧二年即后位婉嫔有婦德美映椒
房寵禮尤隆后無子賈庶人為太子妃時數以肆情忌
嫉失帝意帝慮始終之事欲廢焉后為妃陳情曰賈公

有勲於王室猶當數世宥之况賈妃是其親女夫妬忌亦婦人之常事不足以一眚而忘大德帝納焉及帝晏駕尊曰皇太后賈庶人五日一朝后既喪所天常有戚容庶人謂不悅在己愈自生嫌及星辰有變占於母家不利殿中典兵中郎孟觀等遂進勸庶人謂先倡者有福後廢者受禍庶人遂陷誅后父駿三族及内外親屬遷后於永寧宮賈庶人尋諷百僚奏太后廢為庶人母龐氏付廷尉行刑詔初欲宥之有司希賈庶人意固請

乃從之。龐臨刑，太后截髮稽顙，稱妾以請母於賈庶人，而龐遂見刑。后不勝憂哀，泣崩於幽宮。春秋三十有四。謚曰武悼皇后。

晉后略曰：賈后既殺楊庶人於金墉城，又信妖巫，謂后既死，必訴寃於先帝，乃覆而殯之，施諸厭劾符書藥物，以合瘞之。

惠帝賈皇后

王隱晉書曰：惠賈皇后，諱南風，平陽人也。父充，武帝謀

太子婚久不決上欲取衛瓘女元后欲娶賈充女上曰
衛女有五可賈女有五不可衛家種賢而多子端正長
白賈女種妬而少子醜而短黑郭槐多輸寶物於后遂
娶南風八年二月納為太子妃帝常疑太子不慧故欲
試之盡召東宮官屬作飲食封疑事使太子決之停信
待反賈妃大懼倩外人答詔草別多義給使張泓曰太
子不學而答詔引義必責作草主更益譴負不如直以
意答妃大喜詔泓便為我好答得富貴與汝共之泓素

有小才具草令太子自寫武帝大喜賈妃酷妬嘗手擊殺數人或以刀戟擲孕妾子乃墮地上大怒治金墉城將廢之趙粲荀勗深救之故得不廢洛陽尉部小吏忽有好物尉疑為盜召詰之賈后踈親欲求盜物往聽對辭小吏云先行逢一老嫗說家有疾師卜云當得城南年少厭塞甃相煩尋重報小吏從之上車下帷內著簾箱中行十餘里過六七門限開簾箱忽見樓閣好屋問此何處云天上即以香湯見浴好衣美食將入見一婦

人年三十五六短小青黑色眉後有疵見留數日共宿
歡宴臨出得此衆物賈氏踈親聞其形狀知是賈后慙
笑而去尉亦解意時他人多殺之不出唯此小吏以愛
得出賈后詐有身內橐物為產具取妹夫韓壽兒託之
諒闇所生故弗顯賈庶人臨廢遙喚帝曰陛下有婦使
人廢之亦行自廢詔賜死

晉書后妃傳曰齊王問入廢后后驚曰卿何為來問曰有
詔收后后曰詔當從我出何詔也又問曰誰起事問曰

梁趙后歎曰繫狗當繫其頸今反繫其尾何得不然
晉后略曰載賈后以廉車出承明東掖東門詣金墉城
食金屑而死

惠帝羊皇后

臧氏晉書曰惠帝羊后諱獻容太山南城人也父玄之
字弘猷永康元年立為皇后將入宮衣中有火永興元
年河間王顥使將張方廢后於金墉城七月陳珍等倡
伐成都王復后位八月張方又廢后十一月張方逼

遷大駕幸長安留臺復后位永興二年張方又廢后河

間王顥矯詔賜后死劉暉

他昆切

等上表后得免帝還洛

迎復后位後洛陽令何喬又廢后懷帝即位尊后為皇
后居弘訓宮洛陽敗沒於劉曜曜僭位以為皇后因問
曰朕何如司馬家兒后曰胡可並言陛下開基之聖主
彼亡國之暗夫有一婦一子及身三耳不能庇之貴為
帝王而妻子辱於凡庶之手妾爾時實不思生何圖復
有今日妾生於高門嘗謂世間男子皆然自奉巾櫛已

來始知天下有丈夫耳曜甚愛寵之生二子而死偽謚
獻文帝后

謝夫人

附

晉書曰謝夫人名玖本貧賤父以屠羊為業玖清慧貞
正而有淑姿選入後庭為才人惠帝在東宮將納妃武
帝慮太子未知帷房之事乃遣玖往東宮侍寢由是得
幸有身賈后忌之玖求還西宮遂生愍懷立為太子拜
玖為淑媛愍懷遇酖玖亦被害焉永康初詔改葬太子

因贈玖夫人印綬葬顯平陵

懷帝王太后

臧氏晉書曰懷帝皇太后諱媛姬初入武帝宮拜中才人早崩懷帝即位追尊曰皇太后

梁皇后

臧氏晉書曰梁皇后諱蘭璧安定人也祖桓開府儀同三司父芬司徒后初為豫章王妃懷帝即位為皇后永嘉中沒胡賊

元帝夏侯太妃

晉書曰夏侯太妃名光姬沛國譙人也父莊淮南太守妃生自華宗幼而明慧瑯琊武王為世子覲納焉生元帝元帝立稱皇太妃永嘉元年薨於江左葬瑯琊國初有讖云銅馬入海建業期太妃小字銅環而元帝中興於江左焉

虞皇后

荀氏附

晉書曰元敬虞皇后諱孟母濟陽外黃人父豫元帝為

瑯琊王納后為妃永嘉六年薨大興三年冊贈皇后璽綬祔於太廟

晉書曰豫章君荀氏元帝宮人也初有寵生明帝及瑯琊王伷由是為虞后所忌漸見疎薄明帝即位封建安君別立第宅太寧元年帝迎還臺內供奉隆厚及成帝立尊同於太后咸康元年薨詔曰朕少遭憫凶慈訓無稟撫育之勤建安君之仁也一旦薨殂實思報復永懷平昔感痛哀摧其贈豫章郡君別立廟於京都

明穆廢皇后

晉中興書曰明穆皇后庾氏諱文君左將軍琛第三女也后少以珪璋特異令儀淑美故中宗為肅宗納焉為世子妃仁和有禮深見敬重后生顯宗成皇帝顯宗即位尊后曰皇太后羣臣奏天子幼沖宜依漢和熹皇后故事辭讓數四不得已遂臨朝攝萬機蘇峻作逆王師敗績后見逼辱遂以憂崩時年三十二

成恭杜皇后

晉書曰成恭杜皇后諱陵陽鎮南將軍預之曾孫也成帝以后奕世明德咸康二年備禮拜為皇后后有姿色然長猶無齒有來求婚者輒中止及帝納采之日一夜齒生七年三月后崩年二十一后在位六年無子先是三吳女子相與簪白花望之如素柰傳言天公織女死為之著服至是而后崩

康獻褚皇后

晉中興書曰康獻皇后褚氏字蒜子太傅褒之女也后

聰明有器識以名家女入為瑯琊王妃生孝宗穆皇帝
孝宗即位尊后曰皇太后太元元年太后詔曰皇帝婚
冠禮備遐邇宅心宜當陽親覽緝熙惟始今歸政事率
由舊典於是復稱崇德太后九年崩於顯陽殿

簡文鄭皇后

晉中興書曰簡文宣皇后鄭氏諱阿春滎陽人先適田
氏生一男夫亡后依於舅吳氏中宗為丞相敬后先崩
將納吳氏女為夫人后及吳氏女並遊後園有見之者

言於中宗曰鄭氏女雖嫠居賢於吳氏遠矣遂以德色
納為夫人甚有寵后雖貴幸面恒有憂色中宗問其故
對曰妾有妹中者適長沙王褒餘二妹未出恐姊既為
人妾無復求者中宗從容謂劉瑰曰鄭氏有二妹卿可
求佳對使不失舊舉其從子傭娶第三者以小者適漢
中李氏皆得舊門帝稱尊號后雖為夫人詔太子及東
海武陵王皆母事之帝崩后稱建平國夫人咸和元年
薨太元十九年追尊簡文太后

孝武李太后

晉書曰孝武李太后諱陵容本出微賤始簡文為會稽王有三子廢黜早夭其後諸姬絕孕將八年帝令卜者卮謙筮之曰後房中有一女當育二貴男其一終盛晉室乃令善相者召諸愛妾而示之皆云非其人又悉以諸婢媵示焉時后為宮人在織房中形長而色黑宮人皆謂之崙崙既至相者驚云此其人也帝以大計召之侍寢后數夢兩龍枕膝日月入懷帝聞異焉遂生孝武

帝

王皇后

晉中興書曰孝武定皇后王氏字法惠寧康三年中軍將軍桓沖侍中臣康奏曰晉陵太守王蘊女天性柔順秉心塞淵儀度既同四業允備且盛德之胄美善先積臣等參議可以配德乾元恭承宗廟徽音六宮母儀天下故烈宗納焉后性嗜酒驕妬帝深患之乃召蘊於東堂具說后過狀令加訓誡蘊免冠謝焉后於是少自改

飾太元五年崩


安德陳太后

晉中興書曰安德太后陳氏松滋尋陽人也諱歸女父廣以倡進仕至平昌太守后以美色能歌彈入宮初為淑媛生安恭二帝太元十五年薨贈夫人追宗曰皇太后

恭思褚皇后

晉書曰恭思褚皇后諱靈媛河南陽翟人義興太守爽

之女也后初為瑯琊王妃元熙元年立為皇后生海鹽
富陽公主及帝禪位於宋降為零陵王妃宋元嘉十三
年崩祔葬沖平陵



太平御覽卷一百三十八

欽定四庫全書

子部

太平御覽卷一百

三十九至
四十四

詳校官中書臣金應珩

員外郎臣牛勣文覆勘

總校官降調編修臣倉聖脈

校對官助教臣胡予襄

謄錄監生臣任兆炯

欽定四庫全書

太平御覽卷一百三十九

皇親部五

後魏

叙后事

文封皇后

平文王皇后

宋 李昉等 撰

魏神元寶皇后

桓祁皇后

昭成慕容皇后

獻明賀皇后

道武慕容皇后

道武劉皇后

明元姚皇后

明元杜皇后

太武赫連皇后

太武賀皇后

景穆閭皇后

文成馮皇后

文成李皇后

獻文李皇后

孝文林皇后

孝文高皇后

孝文馮皇后

孝文廢皇后馮氏

叙后事

後魏書魏故事將立皇后必令手鑄金人以成者為吉不成則不得立也又世祖高宗緣保母劬勞之恩極尊崇之意雖事乖典禮而觀過知仁

魏神元竇皇后

後魏書曰神元竇皇后沒鹿回部大人賓之女賓臨終誠其二子速侯回題令其善事帝及賓卒速侯等欲因帝會喪為變語頗漏泄帝聞之知其終不順奉乃先圖

之於是使勇士於中宮晨起以佩刀殺后馳使告速侯等言曰后暴崩速侯等驚走赴因執而殺之

文封皇后

後魏書曰文帝皇后封氏生桓穆二帝後早崩和帝立乃葬焉高宗初穿天淵池獲一石銘稱桓帝葬母封氏遠近赴會二十餘萬人有司以聞命藏之太廟次妃蘭氏生二子長子曰藍早卒次子思帝也

桓祁皇后

後魏書曰桓帝后祁氏生三子長曰普根次惠帝次煬帝平文崩后攝國事時人謂之曰女國后性猛忌平文之崩后所為也

平文王皇后

後魏書曰平文皇后王氏廣寧人年十三因事入宮得幸於平文生昭成平文崩昭成在襁褓時國有內難將害諸皇子后匿帝於袴中懼人知祝曰若天祚未終者汝便無聲遂良久不啼得免於難烈帝之崩國祚殆危

興復大業后之力也十八年崩塋雲中金陵太祖即位配饗太廟

昭成慕容皇后

後魏書曰昭成皇后慕容氏慕容皝之女也有寵生獻明帝泰明皇后性聰敏多智沉厚善決斷專理內事每事多從建國二十三年崩太祖即位配饗太廟

獻明賀皇后

後魏書曰獻明皇后賀氏父野干東部大人后少以容

儀選入東宮生太祖苻洛之內侮也后與太祖及故臣
民避難北徙俄而高車奄來抄掠后乘車與太祖避賊
而南中路失轄后懼仰天告曰國家胄豈至爾絕滅也
惟神靈扶助遂馳輪正不傾而免難其後劉顯使人將
害太祖帝姑為顯弟元望妻知之密以告后后乃令太祖去
之后夜飲顯使醉之向晨故驚廐中羣馬顯使起視馬后
泣而謂曰吾諸子始皆在此今盡亡失汝等誰殺之也
故顯不使急追太祖太祖得至賀蘭部顯怒將害后后夜奔元

塗家匿神車中及三日亢塗舉室請救乃得免會劉顯部亂始得亡去皇始元年崩時年四十六祔塋于盛樂金陵加尊謚配饗焉

道武慕容皇后

後魏書曰道武皇后慕容氏寶之季女也中山平後入充掖庭得幸左丞相衛王儀等奏請立后帝從羣臣后鑄金人成乃立之告於廟封后母孟為溧陽君後崩

道武劉皇后

後魏書曰道武宣穆皇后劉眷女也登國初納為夫人
生華陰公主後生明元后專理內事寵待有加鑄金人
不成故不得登后位魏故事後宮產子將為儲貳其母
皆賜死道武末年后以舊法薨明元即位追尊謚號配
饗太廟此後宮人為帝母皆正位配饗焉

明元姚皇后

後魏書曰明元昭哀皇后姚興女也興封西平長公主
太宗以禮納之後為夫人后以鑄金人不成未昇尊位

然帝寵幸之出入居處如后焉是後猶欲正位而后謙讓不當五年薨帝追恨之贈皇后璽綬而後加謚葬雲中金陵

明元杜皇后

後魏書曰明元密皇后杜氏魏郡鄴人陽平王超之妹也初以良家子選入太子宫有寵生世祖太宗即位拜為貴嬪泰常五年薨謚密貴嬪葬雲中金陵世祖即位追尊號謚配饗太廟又立后廟于鄴刺史四時薦祀後

甘露降於后廟庭高祖時相州刺史高閔表修后廟詔婦人外成理無獨祀陰必配陽以成天地未聞有革之國立太妣之饗便可罷祀先是世祖保母竇氏初以夫家坐事誅與二女俱入宮操行純備進退以禮太宗命為世祖保母性仁慈勤撫導世祖感其恩訓奉養不異所生及即位尊為保太后後尊為皇太后真君元年崩時六十三謚曰惠慈寧郭山從后意也初后常謂左右曰吾於先朝本無位次不可違禮以從園林北山之上可以終

託故塋焉別立后寢廟於崢山建碑頌德

太武赫連皇后

後魏書曰太武皇后赫連氏屈丐女也世祖平統萬納后及二妹俱為貴人後立為皇后高宗初崩祔塋金陵

太武賀皇后

後魏書曰太武敬皇后賀氏代人也初為夫人生恭宗神麴音加元年薨追贈貴嬪塋雲中金陵後追加號謚配饗太廟

景穆閼皇后

後魏書曰景穆恭皇后郁久閼氏河東王毗妹也少以選入東宮有寵真君元年生高宗世祖末年薨高宗即位追尊號謚葬雲中金陵配饗太廟高宗乳母常氏本遼西人太延中以事入宮世祖選乳高宗慈和履順有劬勞保護之功高宗即位為保太后尋尊為皇太后謁於郊廟和平元年崩謚曰昭葬於廣寧磨笄山俗謂之鳴雞山太后遺志也

文成馮皇后

後魏書曰文成文明皇后馮氏父朗秦雍二州刺史西城郡公母樂浪王氏生后於長安有神光之異朗坐事誅后遂入宮世祖昭儀后之姑也雅有母德撫養教訓年十四高宗踐極以選為貴人後立為皇后高宗崩故事國有大喪三日之後御服器物一以燒焚百官及中宮號泣而臨之后悲叫自投火中左右救之良久乃蘇顯祖即位尊后為皇太后丞相乙渾謀逆顯祖年十三居

于諒闇太后密定大策誅渾遂臨朝聽政及高祖生太
后躬親撫養是後罷令不聽政事太后行不正內寵李
奕顯祖因事誅之太后不得意顯祖暴崩時言太后為
之也承明元年尊號曰太皇太后復臨朝聽政事太后
性聰達自入宮掖粗學書計及登尊極省決萬機高祖
詔曰朕以虛寡幼纂寶厯仰恃慈明緝寧四海欲報之
德正覺是憑諸鵲鳥傷生之類宜放山林其以此地為太
皇太后經始靈塔於是罷鷹師曹以其地為報德佛寺

太后與高祖游於方山顧瞻川阜有終焉之志謂羣臣曰舜葬蒼梧二妃不從豈必遠祔山陵然後為貴哉吾百年之後神其安此高祖乃詔有司營建壽陵於方山又起永固石室將終為清廟焉刊石立碑頌太后功德太后以高祖富於春秋乃作勸戒歌三百餘章又作皇誥十八篇太后又制內屬五廟孫外戚六親總麻皆受復除性儉素不好華飾御纓繒而已太后多智畧猜忌能行大事是以威福兼作震動內外故王遇張祐符承祖

等拔自微閭歲終而至王公王叡出入卧内數年之間便
為宰輔賞賚財帛以千萬億計金書鐵券許以不死之
誓李冲雖以器能受任亦由見寵惟幄密加賞賚不可
勝數太后與高祖幸靈泉池燕羣臣及藩國使臣諸方渠
師各令為其方舞高祖率羣臣上壽太后忻然作歌高
祖亦和歌遂命羣臣各言其志於是和歌者九十人太
后外禮民望元丕游明根等頒賜金帛與馬每至褒美
叡等皆引丕等而叅之以示無私也十四年崩於太和

殿年四十九其日有雄雉集於太華殿高祖酌飲不入
口五日毀幕過禮諡曰文明太皇太后葬於永固陵高
祖毀瘠絕酒肉不御內者三年初高祖孝於太后乃於
永固陵東北里餘營壽宮有終焉瞻望之志及遷洛陽
乃自表瀍西以為山園之所而方山虛宮石室至今猶
存號曰千年堂

文成李皇后

後魏書曰文成皇后李氏梁國蒙縣人母頓丘王峻之

妹也后之生也有異於常父方叔恒云此女當大貴及長姿質美麗世祖征永昌王仁出壽春軍至后宅因得后及仁鎮長安遇事誅后與其家人送平城宮高祖登白樓望見之謂左右曰此婦人佳乎左右咸曰然乃下臺后得幸於齋庫中遂有娠常太后後問后后云為帝所幸仍有娠時守庫者亦私書壁記之別加驗問皆相符同生顯祖拜貴人薨後謚曰元皇后葬金陵配饗太廟

獻文李皇后

後魏書曰獻文思皇后李氏中山安喜人南郡王惠之女也姿德婉淑年十八選入東宮顯祖即位為夫人生高祖皇興三年薨上下莫不悼惜葬金陵承明元年追崇號謚配饗太廟

孝文林皇后

後魏書曰孝文貞皇后林氏平涼人叔父金閭起自閭
官有寵於常太后位至尚書封平涼公金閭兄勝為平

涼太守金閭顯祖初為定州刺史未幾為乙渾所誅兄弟皆死勝無子有二女入掖庭后容色美麗得幸於高祖生皇子恂音將為儲貳太和七年后依舊制薨謚曰貞皇后葬金陵及恂以罪賜死有司奏廢后為庶人

孝文廢馮皇后

後魏書曰孝文廢皇后馮氏太師熙之女太和十七年立為后高祖遵經典禮后及夫人嬪妃以下妾御皆以次進車駕南伐后留京師高祖又南伐后率六宮遷洛

陽及后父熙兄誕薨高祖為書慰以叙哀情及車駕還洛恩遇甚厚高祖後重引后姊昭儀至洛稍有寵后禮愛漸衰昭儀自以年長且前入宮掖素見待念輕后而不率妾禮后雖性不妬忌時有愧恨之色昭儀規為內主諧搆百端尋詔廢后為庶人后貞謹有德操遂為練行尼後終於瑤光佛寺

孝文馮皇后

後魏書曰孝文幽皇后亦馮熙女也母曰常氏本微賤

得幸於熙熙元妃公主薨後遂主家事生后與北平公
夙文明太皇太后欲家世貴寵乃簡熙二女俱入掖庭
時年十四其一早卒后有姿媚偏見愛幸未幾疾病文
明太后下詔遣還家為尼高祖獨留念焉歲餘而文明太
后崩高祖服終後頗存訪之聞后素疾痊除遣璽書勞
問遂迎赴洛陽及至寵愛過初專寢當夕宮人希復進
見拜為左昭儀後立為皇后後高祖頻歲南征后遂與
閹宦高菩薩私亂及高祖在汝南不豫后便公然醜恣

中常侍雙蒙等為其心腹中常侍劇鵬諫而不從憤懼致死是時彭城公主宋王劉景子婦也年少嫠居北平公馮夙后之同母弟后求婚於高祖高祖許之而公主志不願后欲強之婚有日矣公主密與侍奴及家僮十餘人乘輕車冒霖雨赴懸瓠奉謁高祖自陳本意因言后與菩薩亂狀高祖聞之因駭愕未之全信而秘匿之惟彭城王侍疾於左右具知其事後后漸憂懼與母常氏求託女巫禱厭無所不至願高祖疾不起一旦得如

文明太后輔少主稱令者賞報不貲乃取三牲宮中妖祠假言祈福專為左道高祖自豫州北幸鄴后慮還見治檢彌懷危怖驟令閹人託參起居皆賜之衣服慙慙寄託勿使泄漏亦令雙蒙參行皆其信者也惟小黃門蘇興壽密陳委曲高祖問其本末勅以勿泄至洛執問菩薩雙蒙等六人迭相証舉具得情狀高祖以疾卧含溫室夜引后并列菩薩等於戶外臨入令搜衣中稍有寸刃便斬后頓首泣謝乃賜坐東楹去御筵二丈餘高

祖令菩薩等陳狀又讓后曰汝母有妖術可具言之后乞屏左右有所密啓高祖勅中常侍悉出唯令長秋卿白整在側后猶不言高祖乃令以綿堅塞整耳小語呼整再三無所應乃命后言隱事人莫知之高祖乃呼彭城北海二王令入坐言昔是汝嫂今乃他人但入勿避二王固辭不獲命及入高祖云此老嫗乃欲白刃揮我肋上汝可窮問本末勿有所難高祖深自引過致愧二王又曰馮家女不得復相廢逐且使在宮中空坐有心乃

能自死汝等勿謂吾猶有情也高祖素至孝猶以文明
太后故未便行廢良久二王乃出賜后自決再拜稽首
泣涕歔歔令宿東房高祖疾甚謂彭城王勰曰後宮久
乖陰政自絕于天若不早為之所恐成漢末故事吾死
之後可賜自盡別宮葬以后禮庶掩馮門之大過高祖
崩北海王祥奉宣遺旨長秋卿白整等入授后藥后走
呼不肯引決整等執持強之乃含椒而盡殯以后禮諡
曰幽后葬長陵塋內

孝文高皇后

後魏書曰孝文文昭皇后高氏司徒公肇妹也父颺母蓋氏凡四男三女皆生於東裔高祖初乃舉室西歸達龍城鎮鎮表后德色婉艷任克宮掖及至文明太后親幸北部曹見后姿貌奇之遂入掖庭年十三初后之幼也曾夢在堂內立而日光自窗中照之灼灼而熱后東西避之光猶斜照不已如是數夕后自怪之以白其父颺颺以問遼東人閔宗宗曰此奇徵也貴不可言颺曰何以

知之宗曰夫日者君之德帝王之象也光照女身將被
帝命誕育人君之象遂生世宗後生廣平王懷次長樂
公主及馮昭儀寵盛密有母養世宗之意后自代如洛
陽暴薨於汲郡之共縣或云昭儀遣人賊后也世祖之
為皇太子三日一朝幽后后拊念慈愛有加親視
櫛沐母道隆備其後有司奏請加謚曰文昭皇后德協坤
從之世宗踐祚追尊配享肅宗詔曰文昭皇后德協坤
儀美符文姒作合高祖實誕英聖而夙世淪暉孤瑩弗

祔先帝孝感自衷遷奉未遂永言哀恨義結幽明廢呂
尊薄禮申漢代又下詔曰文昭皇太后尊配高祖祔廟定
號促令遷奉自終及始太后當主可更上尊號稱太皇
太后初開終寧陵數丈於梓宮上獲大蛇長丈餘黑色
頭有王字蟄而不動靈觀既遷置蛇舊處

太平御覽卷一百三十九

欽定四庫全書

太平御覽卷一百四十

宋 李昉等 撰

皇親部六

後魏

宣武于皇后

宣武高皇后

宣武胡皇后

孝明胡皇后

西魏

孝武高皇后

文帝乙弗后

郁久閭后

廢帝宇文后

恭帝若于后

東魏

孝靖高皇后

後周

文元皇后

文叱奴后

閔元后

明獨孤后

武成阿史那后

孝李后

宣楊后

宣朱后

宣陳后

宣元后

宣尉遲后

靜司馬后

隋

獨孤皇后

宣華夫人

煬帝蕭皇后

後魏宣武于皇后

後魏書曰宣武順皇后于氏太尉烈之弟勁之女也世宗始親政事烈時為領軍總心膂之任以嬪御未備因左右諷諭稱后有容德世宗乃迎入為貴人時年十四甚見寵愛立為皇后謂於太廟后靜默寬容性不妬忌生皇子昌三歲天沒其後后暴崩宮禁事秘人莫悉而世之議者皆歸咎於高夫人葬永泰陵謚曰順皇后

宣武高皇后

後魏書曰宣武高皇后文昭皇后弟偃之女也世宗納為貴

嬪生皇子早夭又生建德公主拜為皇后甚見禮重性妬忌宮人稀得進御及肅宗即位上尊號曰皇太后尋為尼居瑤光寺非大節慶不入宮中建德公主始五六歲靈太后恒置左右撫愛之神龜元年太后出覲母武邑君時天文有變靈太后欲以后當禍是夜遂暴崩天下寃之喪還瑤光佛寺葬殯皆以尼禮世宗暮年高后悍忌夫人嬪御有至帝崩不蒙侍接者由是在洛二十餘年皇太子全育者惟肅宗一人而已

宣武胡皇后

後魏書曰宣武靈皇后胡氏安定臨涇人司徒國珍之女母皇甫氏產后之日赤光四照京兆山北縣有趙胡者善於卜相國珍往問之胡云賢女有大貴之表方為天地母生天地主勿過三人知也后始為尼頗能講道世宗初入講禁中積數歲諷左右稱后姿行世宗聞之召入掖庭為承華世婦而椒掖之中以國舊制相與祈祝皆願生諸王公主不願生太子也惟后每謂夫人等

言天子豈可獨無兒子何緣畏一身之死而令皇家不育
冢嫡乎及肅宗在孕同列猶以故事相恐勸為諸計后
意確然幽夜獨誓云但使所懷是男次第當長子子生身死
所不辭也既誕肅宗進為克華嬪先是世宗頻年喪皇
子自以春秋長矣深加慎護為擇乳母皆取良家宜子
者養於別宮皇后及克華嬪皆莫得而撫視焉及肅宗
踐祚尊后為皇太妃後尊為皇太后臨朝聽政猶稱殿
下令以行事後改令稱詔羣臣上書稱陛下自稱曰朕

太后以肅宗冲幼未堪親祭欲傍周禮夫人與君交獻之義代行祭祀訪尋故式門下召禮官博士議以為不可而太后欲以帷幔自障觀三公行事重問侍中崔光光便據漢時和熹鄧后薦祭故事太后大悅遂攝行祠禮太后性聰悟才藝始既為尼幼相依託略得佛經大義親覽萬機手筆斷決幸西園林法流堂命侍臣射不能射者罰之又自射針孔中之大悅賜左右布帛有差先是太后勅造申訟車時御焉出自雲龍大司馬門從

西而北入自千秋門以納寃訟又親策孝秀州郡計吏
於朝堂太后以肅宗幸華林園宴羣臣於都亭曲水令
王公以下賦七言詩太后詩曰化光造物含氣貞肅宗
詩曰恭己無為賴慈英王公以下賜帛有差太后父薨
百寮表請公除太后不許尋幸永寧寺觀建刹於九級
之基僧尼士女赴者數萬人後幸左藏公主嬪女以下
從者百餘人皆令任力負布絹即以賜之尋幸缺口溫
水登雞頭山自射象牙簪一發中之勅示文武時太后

得志逼幸清河王懌淫亂肆情為天下所惡領軍元乂
長秋卿劉騰等奉肅宗於顯陽殿幽太后於北宮於禁
中殺懌自劉騰死乂又寬怠太后與肅宗及高陽王雍
為計解乂領軍太后復臨朝大赦改元自是朝政踈緩
威恩不立天下牧宰所在貪恠又鄭儼汙亂宮掖勢傾
海內李神軌徐紇並見親侍一二年中位總禁要手握
王爵輕重在心宣淫於朝為四方之所厭穢文武解體
所在亂逆土崩魚爛始於此矣及武泰元年尔朱稱兵

渡河太后盡召明帝六宮皆令入道太后亦自落髮榮遣騎拘送太后及幼主於河陰太后對榮多所陳說榮拂衣而起太后及幼主並被沉於河太后妹馮翊君叔瘞於雙靈寺出帝時始葬以后禮而追加謚焉

又曰靈太后裝飾游幸元順面諍曰禮婦人喪夫自稱未亡人首去珠珥衣帔不緣陛下母臨天下年垂不惑過修容飾何以示後世靈太后慙而還召順責曰千里相徵豈欲衆見辱乎順曰陛下盛服炫容不畏天下所

笑何恥臣之一言乎

孝明胡皇后

後魏書曰孝明胡皇后靈太后從兄冀州刺史盛之女也靈太后欲榮重門族故立為皇后肅宗頗有酒德專嬖充華潘氏及嬪御並無過寵太后為肅宗選納抑屈人流時博陵崔孝芬范陽盧道約隴西李瓚等女但為世婦諸人訴訟咸見怨責武泰初后入道遂居於瑤光寺

西魏孝武高皇后

後魏書曰孝武皇后高氏齊神武長女也帝見立乃納為后及帝西幸關中降為彭城王韶妃

文帝乙弗后

後魏書曰文帝文皇后乙弗氏河南洛陽人也其先世為吐谷渾渠帥居青海號青海王涼州平后之高祖莫瑤擁部落入附拜定州刺史封西平公自莫瑤後三世尚公主女乃多為王妃甚見貴重父瑗儀同三司兗州

刺史母淮陽長公主孝文之第四女也后美容儀少言
笑年數歲父母異之指示諸親曰生女何妨也若此者
實勝男年十六文帝納為妃及帝即位以大統元年冊
為皇后后性好節儉蔬食故衣珠玉羅綺絕於服玩又
仁恕無嫉妬之心帝益重之生男女十二人多早夭惟
太子及武都王戌存焉時新都關中務欲東討蠕蠕音軟
寇邊未遑北伐故帝結婚以撫之於是更納悼后命遜
居別宮出家為尼悼后猶猜忌復徙秦州依子秦州刺史武

都王帝雖限大計恩好不忘後宥令養髮有追還之意
然秘禁外無知者六年春蠕蠕舉國渡河前驅已漸逼
頗有言虜為悼后之故興此役帝曰豈有百萬之衆為
一女子舉也雖然致此物論朕亦何顏以見將帥耶乃
遣中常侍曹寵賁手勅令后自盡后奉勅揮淚謂寵曰
願至尊享年千萬歲天下康寧死無恨矣因命武都王
前與之訣遺語皇太子辭皆悽愴因慟哭久之侍御咸
垂涕失聲莫能仰視召僧設供令侍婢數十人出家手

為落髮事畢乃入室引被自覆而崩年三十一鑿麥積
崖為龕而葬神柩將入有二叢雲先入龕中頃之一滅
一出後號寂陵及文帝山陵畢手書云萬歲後令后配
享公卿乃議追謚曰文皇后祔于太廟廢帝時合葬於
永陵

郁久閭后

後魏書曰文帝悼皇后郁久閭氏蠕蠕主阿那瓌之
女容貌端嚴夙有成智大統初蠕蠕屢犯北邊文帝乃

與通好結婚扶風王孚受使奉迎蠕蠕俗以東為貴后
之來營幕戶席一皆東向車七百乘騾萬疋驢千頭到
黑鹽池魏朝鹵簿文物始至孚奏請正南面后曰我未
見魏主故蠕蠕女也魏仗向南我自東面孚無以辭四
年正月至京師立為皇后時年十四六年後懷孕將產
居於瑤華殿聞上有狗吠聲心甚惡之又見婦人盛飾
來至后所后謂左右曰此為何人璽巫傍侍悉無見者
時以為文后之靈座訖而崩年十六葬於少陵原十七

年合葬永陵當會橫橋北后梓宮先至鹿苑帝輟音輟

音後來將就次所輒折不進

廢帝宇文后

後魏書曰廢帝皇后宇文后周文帝女也后初產之日有雲氣滿室氛氲久之幼有風神好陳列女圖置之左右周文曰每見此女良慰人意廢帝之為太子納為妃及即位為皇后志操明秀帝深重之專寵後宮不置嬪御帝既廢崩后亦以忠於魏室惟禍

恭帝若于后

後魏書曰恭帝后若于氏司空長樂正公惠之女也有容色恭帝納之為妃及即位立為皇后後出家為尼在佛寺薨竟無諡

東魏孝靖高皇后

後魏書曰孝靜高皇后齊神武王之第二女也天平四年詔聘以為后王前後固辭帝不許興和中詔侍中司徒孫騰司空襄成王旭

一云泉

兼尚書令司州牧西河王

宗

切藏宗

兼太常卿及宗正卿元孝友等奉詔致禮并備

宮官侍衛以后駕迎於晉陽之丞相第五月立為皇后

大赦天下齊受禪降為中山王妃後降於尚書左僕射楊遵彥

後周文元皇后

後周書曰文元皇后魏孝武妹初封平原公主適開府
張歡遇后無禮帝殺歡改封后馮翊公主以配太祖生
孝閔薨合葬成陵武成初尊追為皇后

文叱奴后

後周書曰叱奴后代人太祖為丞相納為姪生高祖天和三年六月尊為皇太后建德三年三月癸酉崩四月丁巳葬固陵

閔元后

後周書曰閔元皇后名胡摩魏文帝第五女初封晉安公主帝之為洛陽公尚焉及踐祚立為皇后帝被廢后出俗為尼高祖誅晉公護上帝尊號為帝以后為孝閔皇后居崇德宮隋氏革命居里第大業十二年殂

明獨孤后

後周書曰明獨孤后太保衛公信之長女帝之在藩為夫人二年正月立為皇后即位數日崩葬昭陵世宗崩與后合葬

武成阿史那后

後周書曰武成阿史那后突厥木杆可汗侯斤之女突厥滅蠕蠕後盡有塞表之地控弦數十萬衆志陵中夏太祖方與齊人爭衡侯斤初欲以女配帝保定五年二

月詔陳公純等備皇后文物及行殿并六宮以下一百
二十人至俟斤牙帳所迎后俟斤又許齊人以婚將有
異志純等在彼累請不得反命會雷風大起颶壞其穹
廬等旬日不止俟斤大懼以為天譴去戰切乃禮送后及
純等設行殿羽儀奉之以歸高祖行親迎之禮后有姿
貌善容止高祖深敬焉宣帝即位尊為天元上皇太后
開皇二年殂年三十二隋文詔后祔葬孝陵

武帝李后

後周書曰武帝李后名娥姿楚人于謹平江陵后家被籍沒至長安太祖以后賜高祖幸之生宣帝宣帝即位尊為天元聖皇太后宣帝崩靜帝尊為大帝太后隋開皇初出俗為尼改名常悲薨以尼禮葬於京城南

宣帝楊后

後周書曰宣帝楊后名麗華隋文帝長女帝在東宮高祖為帝納后為皇太子妃宣政元年立為天元皇后后性柔婉不妬忌四皇后及嬪御等咸愛而仰之帝後昏

暴滋甚喜怒乖度嘗譴后欲加之罪后進止詳閒辭色
不撓帝大怒遂賜后死逼令引決后母獨孤氏聞之詣
閤陳謝叩頭流血然後得免帝崩靜帝尊為皇太后居
於宏聖宮先是宣帝不豫詔隋文帝入禁中侍疾及大
漸劉昉鄭譯等因矯詔以后父受遺輔政后雖初不預
謀然嗣主幼冲恐權在他族不利於已聞昉譯已行此
詔甚悅後知父有異圖意頗不平形於顏色及行禪代
憤惋愈甚隋文帝既不能譴責內甚愧之開皇六年封

后為樂平公主後又議奪其志后誓不許乃止大業中
殂祔葬定陵

宣朱后

後周書曰宣朱皇后名滿月吳人也其家坐事没入東
宮帝為太子后被選掌衣服召而幸之遂生靜帝靜帝
立尊為天元帝后后本非良家子年長於帝十歲踈賤
無寵以靜帝故特尊崇之宣帝崩靜帝即位尊為太后
隋初出俗為尼改名法淨後殂以尼禮葬之京城

宣陳后

後周書曰宣帝陳皇后名月儀潁川人大將軍山提之第八女也選入宮拜為德妃月餘立為天元左皇后帝崩出俗為尼改名華光父山提高祖平齊拜大將軍以后父超授上柱國除太宗伯

宣元后

後周書曰宣帝皇后名樂尚河南洛陽人也開府歲之第二女年十五時被選入宮拜貴妃大豫元年七月立

為天祐皇后宣帝崩出俗為尼改名華勝父晟少以元氏宗室拜開府大象元年以後父進位上柱國拜翼國公

宣尉遲后

後周書曰宣帝尉遲皇后名繁熾蜀公迴之孫女也有美色初適杞公亮子西陽公溫以宗婦例入朝帝逼而幸之後亮聞謀逆帝遂誅溫追后入宮立為天祐大皇后帝崩出俗為尼改名華道隋開皇十五年殂

靜司馬后

後周書曰靜帝司馬后名令姬柱國滎陽公消難之女也
宣帝傳位於帝納后為皇后隋文帝以后父已擁衆奔
陳廢后為庶人嫁為同州刺史李丹妻

隋文獨孤皇后

隋書曰文獻獨孤皇后河南洛陽人周大司馬河內公
信之女也信見高祖有奇表故以后妻焉時年十四高
祖與后相得誓無異生之子后初亦柔順恭孝不失婦

道后姊為周明帝后長女為周宣帝后貴戚之盛莫與
為比而后每謙卑自守世以為賢及周宣帝崩高祖居
禁中總百揆后使人謁高祖曰大事已然騎獸之勢必
不得下勉之高祖受禪立為皇后性尤妬忌上亦每事
惟后言是用后見諸王及朝士有妾孕者必勸上斥之
時皇太子多內寵妃元氏暴薨后意太子愛妾雲氏害
之由是諷上竟廢太子立晉王廣皆后之謀也仁壽二
年八月甲子日暈四重己巳太白犯軒轅其夜后崩於

永樂宮時年五十九葬於太陵

宣華夫人

隋書曰宣華夫人陳氏乃陳宣帝之女也性聰惠姿貌無雙及陳滅配掖庭後選入為宮嬪時獨孤皇后性妬忌後宮罕得進御唯陳氏有寵晉王廣之在藩也陰有奪宗之計規為內助每致禮物以取媚於陳氏皇太子廢立之際頗有力焉及文獻皇后崩進位為貴人專房擅寵主斷內事六宮莫與為比及上大漸遺詔拜為宣

華夫人煬帝嗣位之後出居仙都宮尋召入歲餘而終
時年二十九帝悼之為製神傷賦

煬帝蕭皇后

隋書曰煬帝皇后蕭氏梁明帝歸之女也江南風俗
二月生子者不舉后以二月生由是季父岌收而養之
未幾夫妻俱死轉養舅氏張軻家然軻甚貧窶后躬親
勞苦煬帝為晉王時高祖將為王選妃於梁遍占諸女
皆不吉歸迎后於舅氏令使者占之曰吉於是遂策為

王妃后性婉順有智識好學解屬文頗知占候高祖大喜之帝甚寵敬焉及帝嗣位詔立為后帝每遊幸未嘗不隨侍後及宇文氏之亂隨軍至聊城化及敗沒於竇建德突厥處羅可汗遣使迎后於洛州建德不敢留遂入於虜庭唐貞觀四年破突厥乃以禮致之歸於京師

太平御覽卷一百四十

欽定四庫全書

太平御覽卷一百四十一

宋 李昉等 撰

皇親部七

唐高祖竇皇后

太宗長孫皇后

徐妃附

高宗廢王皇后

中宗趙皇后

廢韋皇后

上官昭容

睿宗劉皇后

竇皇后

玄宗廢王皇后

武皇后

楊貴妃

楊皇后

肅宗張皇后

吳皇后

代宗沈皇后

獨孤皇后

德宗王皇后

韋賢妃

順宗王皇后

憲宗郭皇后

女學士宋尚宮附

穆宗王皇后

穆宗蕭皇后

敬宗郭貴妃

昭宗何皇后

高祖竇皇后

唐書曰高祖太穆順聖皇后竇氏京兆平陵人隋定州
總管神武公毅之女也后母周武帝姊襄陽長公主后
生而髮垂過頸三歲與身齊周武帝特愛重之養於宮
中時武帝納突厥女為后無寵后尚幼竊言於帝曰四
邊未靜突厥尚強願舅抑情撫慰以蒼生為念但得突
厥之助則江南關東不能為患矣武帝深納之毅聞之
謂長公主曰此女才貌如此不可以妄許人當為求賢

决乃於門屏畫二孔雀諸公子有求婚者輒與兩箭射之潛約中目者許之前後數十輩莫能中高祖後至兩發各中一目毅大悅遂歸於我及周武帝崩后追思如喪所生隋文帝受禪后聞而流涕自投於床曰恨我不為男以救舅氏之難毅與長公主遽掩口曰汝勿妄言滅吾族矣后事元貞太后以孝聞太后素有羸疾時或危篤諸姒以太后性嚴懼進侍皆稱疾而退唯后晝夜扶持不脫衣履者動淹旬月善書與高祖書相類人莫能

辨工篇章而好存規誡大業中高祖為扶風太守有駿
馬數疋常言於高祖曰上好鷹愛馬公之所知此堪進
御不可久留人或言者必為累願熟思之高祖未決竟
以此獲譴未幾后崩於涿郡時年四十五高祖追思后
言方為自安之計數求鷹犬以進之俄而擢拜將軍因
流涕謂諸子曰我早從汝母之言居此官久矣初葬壽
安陵後祔葬

太宗長孫皇后

唐書曰太宗順聖皇后長孫氏長安人隋右驍衛將軍晟之女也后少好讀書造次必循禮則年十三嬪於太宗武德元年冊為秦王妃九年冊拜皇太子妃太宗即位立為皇后后性尤儉約凡所服御取給而已太宗彌加禮待十年六月辛卯崩於立政殿時年三十六葬於昭陵后常撰古婦人善事勸戒十卷名曰女則自為之序又著論駁漢明德馬皇后以為不能抑退外戚令其當朝貴盛乃戒其龍馬水車此乃開其禍源而妨其末事耳

且誠主守者曰此吾以自防閑耳婦人著述無條貫不欲至尊見之慎勿言崩後宮司以聞太宗覽而增慟以示近臣曰皇后此書足可垂於後代我豈不達天命而不能割情乎以其善能規諫補朕之闕今不復聞善言是內失一良佐以此益令人哀耳上元元年改上后尊號曰文德順聖皇后

徐妃

附

唐書曰太宗賢妃徐氏名惠右散騎常侍堅之姑也生

五月而能言四歲誦論語毛詩八歲好屬文其父孝德
試擬楚辭曰山中不可以久留詞甚典美自此遍涉經
史手不釋卷太宗聞之納為才人其所屬文揮翰立成
詞華綺贍俄拜婕妤再遷充容時軍旅亟動宮室稍興
百姓頗倦勞役上疏諫之太宗善其言優賜甚厚及太
宗崩追思顧遇之恩哀慕愈甚發疾不自醫疾甚謂所
親曰吾荷顧實深志在早歿冀其有靈得侍園寢吾之
志也因為七言詩及連珠以見志永徽元年卒時年二

十四詔贈賢妃陪葬於昭陵之石室

高宗廢王皇后

唐書曰高宗廢后王氏并州祁人也父仁祐同安長公主即后之從祖母也公主以后有美色言於太宗遂納為晉王妃高宗升儲冊為皇太子妃永徽初立為皇后初武皇后貞觀末隨太宗嬪御居於感業寺后及左右數為之言高宗由是復召入宮立為昭儀俄而漸承寵恩遂與后及良娣蕭氏遞相譖毀帝終不納后言而武昭

儀寵日厚后懼不自安密與母劉氏求巫氏厭勝事發
帝大怒斷劉氏不許入宮將廢后長孫無忌褚遂良等
固諫乃止俄又納李義府之策永徽六年廢后及蕭良
娣皆為庶人囚別院武昭儀令人皆縊殺之

中宗趙皇后

唐書曰中宗和思皇后趙氏京兆長安人父瓌尚高祖
女常樂公主中宗為英王時納后為妃既而妃母公主得
罪妃亦坐幽死於內侍省則天臨朝瓌為壽州刺史坐

與越王貞連謀被誅公主亦坐死神龍元年贈后諡為恭皇后及中宗崩將葬於定陵追諡后為和思莫知瘞所以皇后禕衣於陵所寢宮招魂置衣於魂輦以太牢告於衣遷於寢宮舒於御榻之右覆以夷衾而祔葬焉

中宗廢韋皇后

唐書曰中宗韋庶人京兆萬年人也中宗為太子時納后為妃仍擢后父元貞為豫州刺史嗣聖元年立為皇后其年中宗見廢后隨徙房州時中宗懼不自安每使

至惶恐欲自殺后勸王曰禍福倚伏何常之有豈失一
死何遽如是也每同艱危情義甚篤所生懿德太子永
泰永壽長寧安樂四公主安樂最幼生於房州帝自脫
衣裹之遂名曰裹兒特寵異焉及中宗召還立為太子
又立后為妃中興初復立為皇后帝在房州時常謂后
曰一朝見天日乃不相禁忌及得志後受上官昭容邪
說引武三思入宮升御床與后雙陸帝為點壽以為歡
笑醜聲日聞於外景龍四年六月帝遇暴崩后懼秘不

發喪及臨淄王勒兵入內后懼駭遁入殿前飛騎營及武延秀安樂公主皆為亂兵所殺追貶為庶人

上官昭容

唐書曰中宗上官昭容名婉兒西臺侍郎儀之孫也父庭芝與儀同被誅婉兒時在襁褓隨配入掖庭及長有文詞明習史事則天時婉兒忤旨當誅則天惜其才不殺但黥其面而已自聖歷以後百司表奏多令叅決中宗即位又令專掌制命深被信任尋拜為昭容婉兒既

與武三思淫亂每下制勅多因事推尊武氏而排抑皇家節愍太子深惡之及舉兵至肅章門扣閤索婉兒婉兒大言曰觀其此意即當次索皇后以及大家帝與后隨激怒并將婉兒登玄武門樓以避兵鋒俄而事定婉兒常勸帝廣置招文學士盛引當朝詞學之臣數賜遊宴賦詩唱和婉兒每代帝及后長寧安樂二公主數首並作辭甚綺麗時人咸諷誦之婉兒俄又通於吏部侍郎崔湜引知政事湜嘗充使開商山新路功未半而中宗

崩婉兒代草遺制曲加褒賞及韋庶人敗婉兒亦斬於
纛下

睿宗劉皇后

唐書曰睿宗肅明順聖皇后劉氏父延景陝西刺史儀
鳳中睿宗居藩納后為孺人尋立為妃生寧王憲壽昌
代國二公主睿宗即位冊為皇后又降為皇嗣后後降
為妃長壽中與昭成皇后同被譴為則天所殺景雲元
年追謚肅明皇后招魂葬於東都城南陵曰惠陵

睿宗寶皇后

唐書曰睿宗昭成順聖皇后寶氏父孝謙潤州刺史后
姿容婉順動循禮則睿宗為湘王時納為孺人甚見禮
待光宅元年立為德妃生玄宗及金仙玉真二公主長
壽二年為戶婢團兒誣譖與肅明皇后厭蠱呪詛正月
二日朝則天皇后於嘉豫殿既退而同時遇害梓宮秘
密莫知所在睿宗即位謚曰昭成皇后招魂葬於東都
之南陵曰靖陵

玄宗廢王皇后

唐書曰玄宗廢皇后王氏同州下邳人梁冀州刺史神
念之後上為臨淄王時納為妃上將起事頗預密謀贊
成大業先天元年立為皇后以父仁皎為太僕卿后兄
守一以后無子嘗懼有廢立導以符厭之事有左道僧
明悟為祭北斗刻霹靂木書天地字及上諱合而佩
之且呪曰佩此有子當與則天皇后為比事發上親究
之皆驗下制廢為庶人守一賜死其年十月卒以一品

禮葬於無相寺寶應元年雪冤復尊為皇后

玄宗武皇后

唐書曰玄宗貞順皇后武氏則天從父兄子恒安王攸止女也攸止卒後后尚幼隨例入宮上即位漸承恩寵及王庶人廢後特賜號為惠妃宮中禮秩一同皇后惠妃開元初產夏悼王及懷哀王上仙公主並襁褓不育上特垂傷悼及生壽王瑁不敢養於宮中命寧王憲於外養之又生盛王琦咸宜太華二公主惠妃以開元二

十五年薨年四十餘

楊貴妃

唐書曰玄宗楊貴妃父元瑛蜀州司戶妃幼孤養於叔父元璣開元初武惠妃特承恩遇故王皇后廢黜二十四年惠妃薨帝哀悼久之後庭數千無可意者或奏元瑛女姿色冠代宜蒙召見時妃衣道士服號曰太真既進見玄宗大悅不期歲恩禮如惠妃太真姿質豐艷善舞通音律智算過人每倩盼承迎動移上意宮中呼為

娘子禮數寔同皇后有姊三人皆有才貌玄宗並封為國夫人天寶中安祿山大立遣功上深寵之祿山來朝帝令貴妃姊妹與祿山結為兄弟祿山母事妃每宴賜賚稠沓及祿山叛露檄數國忠之罪河北盜起玄宗以皇太子為天下兵馬元帥監撫軍國事國忠大懼諸楊聚哭貴妃銜土陳情帝遂不行內禪及潼關失守從幸至馬嵬禁軍大將陳元禮密白太子誅國忠父子既而六軍不散玄宗遣力士宣問對曰賊本尚在蓋貴妃也力士復

奏帝不獲已與妃訣遂縊死於佛堂時年三十八瘞於
驛西道側

玄宗楊皇后

唐書曰玄宗元獻皇后楊氏弘農華陰人景雲元年八月
選入太子宫時太平公主用事尤忌東宮宮中左右
持兩端而潛附太平者必陰伺察事雖纖芥皆聞於上
太子心不自安后時方娠太子密語侍讀張說曰用事
者不欲吾多息裔恐禍及此婦人其如之何密令說懷

去胎藥而入太子於曲室躬自煑藥黥然似寐夢神人覆鼎既寤復夢如是者三太子異之告說說曰天命也無他慮既而太平誅后果生肅宗皇帝太子妃王氏無子后班在下后不敢母肅宗為王妃所鞠慈甚所生開元中肅宗為忠王而妃又生寧親公主張說以舊恩持承寵異說亦奇忠王儀表心知運歷所鍾故寧親公主降說子均開元十七年后薨葬細柳原

肅宗張皇后

唐書曰肅宗張皇后本南陽西鄂人家昭應祖母竇氏
玄宗母昭成皇太后之妹也昭成為天后所殺玄宗幼
失所恃為竇姨鞠養景雲中封鄧國夫人父去逸天寶
中選入太子宫為良娣后辨慧豐碩巧中上旨祿山之
亂玄宗幸蜀太子與良娣俱從車駕渡渭百姓遮道請
留太子收復長安肅宗性仁孝以上皇播越不欲違離
左右宦者李靖忠啓太子請留良娣贊成之於是冊太
子如靈武時賊陷京師從官單寡路道多虞每太子次

舍宿止良娣必居其前太子曰捍禦非婦人之事何以居前良娣曰大家跋履險艱兵衛非多恐有倉卒妾自當之大家可由後而出庭幾無患及至靈武產子三日起縫戰士衣太子勞之曰產忌作勞安可容易后曰此非妾自養之時須辦大家事肅宗即位冊為淑妃贈父去逸左僕射母竇氏封義章縣主乾元元年冊為皇后肅宗崩太子監國遂移后於別殿幽宮崩

肅宗吳皇后

唐書曰肅宗章敬皇后吳氏濮陽人后父坐事没入掖
庭開元二十二年玄宗幸忠王邸見服御蕭然傍無姬
侍命將軍高力士選掖庭宮人賜之而后在籍中容止
端麗性無驕傲寵遇益隆明年生代宗皇帝二十八年
薨葬春明門外代宗即位羣臣以肅宗山陵有期準禮
以先太后祔

代宗沈皇后

唐書曰代宗睿真皇后沈氏吳興人世為冠族父易直

祕書監開元末以良家子選入東宮太子以賜廣平王天寶元年生德宗皇帝祿山之亂玄宗幸蜀諸王妃主從幸不及者多陷於賊后被囚於東都掖庭及代宗破賊收東都見之留后於宮中方經畧北征未及迎歸長安俄而史思明再陷河洛及朝義敗復收東都失后所在莫測存亡代宗遣使求訪十餘年寂無所聞德宗即位下詔追尊為皇太后

代宗獨孤皇后

唐書曰太宗貞懿皇后獨孤氏父穎左威衛錄事叅軍
后以美麗入宮嬖幸專房故長秋虛位諸姬罕所進御
后始冊為貴妃生韓王迴華陽公主大厯十年五月薨
追謚貞懿皇后嬪於內殿累年不忍出宮十三年十月
方葬命宰臣常袞為哀冊

德宗王皇后

唐書曰德宗昭德皇后王氏父遇官至祕書監德宗為
魯王特納后為嬪上元二年生順宗皇帝特承寵異德

宗即位冊為淑妃貞元二年妃病十一月甲午冊為皇后是日崩於兩儀殿

韋賢妃

唐書曰德宗韋賢妃不知氏族所出初為良娣貞元二年冊為賢妃性敏慧言動必有禮德宗深重之六宮師其德行及德宗崩請於崇陵終喪已因侍於寢園元和四年薨

順宗王皇后

唐書曰順宗莊憲皇后王氏瑯琊人父顏衡尉卿后幼以良家子選入宮為才人順宗在藩時代宗以才人賜之時年十三大歷十三年生憲宗皇帝立以為王孺人順宗升儲冊為良娣后言容恭謹宮中稱其德行順宗即位疾恙未平后供侍醫藥不離左右屬帝不能言冊禮將行復止及憲宗受禪冊為太上皇后中和元年正月順宗晏駕五月尊太上皇后為皇太后冊禮畢憲宗御紫宸宣赦太后居興慶宮后性仁和恭遜深抑外戚

無絲毫假貸訓厲內職有母儀之風焉元和十一年三月崩於咸寧殿謚曰莊憲

憲宗郭皇后

唐書曰憲宗懿安皇后郭氏尚父子儀之孫駙馬都尉曖之女母代宗長女昇平公主憲宗為廣陵王時納后為妃以妃家父祖有大勲於王室順宗深寵異之貞元十一年生穆宗皇帝元和元年冊為貴妃時帝後庭多私愛以后門族華盛慮正位之後不容嬖幸以是冊拜後

時穆宗嗣位冊為皇太后敬宗即位尊太皇太后宣宗
繼統即后之諸子也恩禮愈異於前朝大中年崩於興
慶宮諡曰懿安祔葬於景陵后歷七朝五居太母之尊
人君行子孫之禮福壽隆貴四十餘年雖漢之馬鄧無
以加焉

女學士宋尚宮

附

唐書曰女學士尚宮宋氏者名若昭貝州清陽人父廷
芬世為儒學至廷芬有詞藻生五女皆聰慧廷芬始教

以經藝既而課為詩賦年未及笄皆善屬文長曰若莘次
曰若昭若倫若憲若荀若莘若昭文尤高性復貞素閒
雅不尚芳華之飾共白父母誓不從人願以藝學揚名
顯親若莘教誨四妹有如嚴師著女論語十篇其言
模倣論語以韋逞母宣文君宋氏代仲尼以曹大家等
代顏閔其間問答悉以婦道所尚若昭注解皆有理致貞
元四年昭義節度使李抱真表薦以聞德宗俱召入宮試
以詩賦兼問經史中大義深加嘆賞德宗能詩侍臣倡

和相屬亦令若莘姊妹應制每進御無不稱善嘉其節
概不羣不以宮妾御之呼為學士先生廷芬起家授饒
州司馬習藝館內教賜第一區給俸料元和末莘卒贈
河內郡君自貞元七年以後宮中記註簿籍若莘掌其
事穆宗復令若昭代司其職拜尚宮姊妹中若昭尤通
曉人事自憲穆敬三帝呼為先生六宮嬪媛諸王公主
駙馬皆師之為之致敬進封國夫人寶歷初卒將塋詔
所司供鹵簿敬宗復令若憲代司宮籍文宗好文以若

憲善屬文能論議奏對尤重之太和中坐駙馬沈彥事幽
若憲於外第賜死

穆宗王皇后

唐書曰穆宗恭僖皇后王氏越州人父紹卿婺州金華
令后少入太子宫元和四年生敬宗穆宗皇帝即位立
為妃長慶四年二月尊為皇太后文宗即位之初號寶
歷太后

穆宗蕭皇后

唐書曰穆宗貞憲皇后蕭氏福建人初入十六宅為建安王侍者元和四年生文宗皇帝寶曆三年敬宗崩中尉王守澄率兵討賊迎江王即位文宗踐祚之月奉冊上尊號曰皇太后武宗即位供養彌謹徙宮積慶殿號積慶太后會昌中崩諡曰貞獻

敬宗郭貴妃

唐書曰敬宗郭貴妃父義右武衛將軍長慶時以姿貌選入太子宮敬宗即位為才人生晉王帝以少年有子

復以才人容德冠絕特寵異之俄冊為貴妃及昭愍遇盜宮闈變起文帝即位尤憐晉王有若己子故晉妃禮遇不衰

昭宗何皇后

唐書曰昭宗積善皇后何氏東蜀人侍壽王邸婉麗多智特承恩顧生德王輝王昭宗即位立為淑妃乾寧中車駕在華州冊為皇后自乾符以後盜滿天下妖生九重宮廟榛蕪奔播不暇景福之際奸臣內侮帝后蒙塵薄守

之中嘗膳禦侮不離左右天祐初朱全忠逼輿駕東幸洛陽其年八月昭宗弒翌日宰相柳璨獨孤損等詐宣皇后令云為宮人所害輝王既即位乃尊后為皇太后太后遭罹變故迫以兇威宮中哭泣不敢聲聞於外明年十二月全忠將僭位先行九錫然後受禪全忠牙將蔣玄暉在洛陽宮中知樞密宣徽副使趙殷衡素與不叶且欲代知樞密事因使於梁誣告云玄暉嘗與何太后共為盟詛誓復唐室不欲王受九錫全忠大怒即日遣

使至洛陽誅玄暉太后亦被害於積善宮又殺宮人阿秋阿虔仍廢太后為庶人

太平御覽卷一百四十一